

1 Pedru

Īsazei'wa **norĩ ma, Pedru te te** **ĩrob'ui'éré na'rata zé** **Ībaihâ wasu'uzé**

Ā Ībaihâ hã Pedru te te ĩrob'ui'éré hã Zezusihi zazei'wa norĩ hã daro mono bâ 're ĩsi'ubumroi mono norĩ ma, ma tô rob'ui'éré, ĩsazei'wa 're nomro mono 'ru te, da te tãma 're ĩrob'manharĩ za'ra mono norĩ ma. Īsazei'wa norĩ hã danhib'rata te te 're robzépata za'ra mono wa, ma tô Pedru hã tin-himi'ui'éré na pê'ēhiri za'ra. Taha na ma tô pawap-tob za'ra, siptete sina Zezusihi āma si 're nomro mono da. Cristu hã wanhowa te te ĩrobzépata na hã ma tô duré tãma waihu'u za'ra, duré wa norĩ hã ĩsire 're wanomro mono wa, za ĩsine wa te 're ĩrobzépata za'ra mono zém na hã. Āne ma tô duré tãma waihu'u za'ra: 'Re ĩhâimana u'âsi mono hã ma tô te te 're aipibu za'ra wa'wa, tô sena 're umnhasi za'ra wa'aba mono zô.

¹ Wa hã Pedru, Zezu Cristu te te ĩpisudu, ĩsadawa wasu'u'wa 're ĩmorĩ da. Āhãna wa za āma aima rob'ui'éré za'ra wa'wa, 'Re ĩhâimana u'âsi mono nhib'a'uwē norĩ ma. Aiom nhiti te dawazari 're aihâimana za'ra wa'aba mo, danhipti'a nho'ōmo mono bâ, Pōtu āma, duré Darasiza āma, duré Capadosiza āma, duré Azi'a āma, duré Bitinha āma.

² Aipoto za'ra wa'aba ō ré, ma tô Wamama hã sima aipisutu sirōmo za'ra wa'wa, 'Re ĩhâimana u'âsi mono hã, ĩsib'a'uwē oto 're anomro aba mono da. Taha da, ma tô oto Tipē'ēzani hã aipē'ē 're aima

sõmri za'ra wa'wa, aiwẽ uptabi na oto õhõ ãma si 're anomro aba mono da, duré Zezu Cristuhu nhimiroti si 're wapari pese za'ra wa'aba mono da, duré Cristu hã dazada ìdâ'âzéb zarina, aipẽ'ẽ 're te te 're ai'a'upsõi wa'aba mono wa, aiwasété ãna ãma 're anomro aba mono da oto.

'Re ìhâimana u'âsi mono ma, wa ai'ãma 're ìmreme u'âsi za'ra wa'wa, ìsimizawizé hã ai'ãma 're hâimana u'âsi za'ra wa'aba mono da, rowẽ u'âsi, ãma 're anomro aba mono da, taha ãma si.

Rowẽ uptabi zô, 're ìdanhimipari za'ra mono zé wasu'u

³ 'Re ìhâimana u'âsi mono ãma si oto 're wawata u'âsi za'ra wa'aba mono, Wanhib'apito Zezu Cristuhu mama ãma. E marĩ wa. Ìpẽ'êzézé hã sa'ëtê na tãma 're hâimana mono wa, ma tô wa'apoto té, wapẽ'ẽ 're, wahâimanazép té ìwẽ na si oto ãma 're wahâimana za'ra mono da. Zezu Cristu hã dâ'â uptabi nherẽ, ma tô Ìmama hã ab're hawi hâiwa'utu, tiwaihu'u pese na. Taha zarina, wa za duré wasina sô 're wanhimipari za'ra, 're wadâ'â za'ra mono pari, te te 're ìwa'ahâiwa'utu mono zéb zô.

⁴ Nimahã na, te za marĩ hã ìwẽ hã te te wama 're anhomri, tinhib'a'uwẽ norĩ zô te te 're ì'ab'madâ'â mono hã hâiwa ãma. Tame ìwẽ uptabi si te asô 're simi'wara u'âsi 'wa, dawì 're ìsi'utõrĩ waihu'u za'ra mono õ hã, dawì 're ìwasété za'ra mono õ hã duré.

⁵ Ate za'ra wa'aba da, te ìwẽ hã asô 're hâimana u'âsi za'ra wa'wa. A norĩ wa'wa hã ìwaihu'u pese na te oto asina 're ì'umnhasi za'ra wa'aba mo. Taha wa, te za ìwasété wi te te 're ai'madâ'â pese za'ra wa'wa, asõ'reptui wa'aba zé hã asina uwaimrami za'ra wa'aba da, ro ìsi'utõrĩzéb ãma.

⁶ Taha wa, te za ĭwasu'uwě zarina aipě'ě 're, 're atoi u'âsi za'ra wa'aba mo, rowasédé hã asada 're hâimana za'ra wa'aba mono wa, 're robzépata za'ra wa'aba mono nherě.

⁷ Wanhíb'apito umnhasi sina 're aihâimana za'ra wa'aba mono zô, te za rowasédé hã asada 're hâimana za'ra wa'wa. Wanhíb'apito Zezu Cristuhu ma, wě di, Wanhíb'apito umnhasi sina 're aihâimana za'ra wa'aba mono zé hã. Ětě'ubuzi pré oru hã dama ĭsawi pese zém nhipai u, tãma wě di. Ětě'ubuzi pré oru hã wa'âbâ za'ětě wa, dama sawi pese di, ta hã dama 're hâimana u'âsi mono dai ô nherě. Zata ô zô, te za unhama wa hiri ni, zata ô wa, da te ĭwaihu'uzéb da hã, oru uptabi na. Tane, a norĩ wa'wa hã rowasédé hã asada 're hâimana za'ra wa'aba mono nherě, Wanhíb'apito umnhasi sina 're aihâimana u'âsi za'ra wa'aba mono wamhã, apâ wei morĩ wapsi, te za danho'a ai'ãma tiwata za'ra wa'wa, ôhõ umnhasi sina ãma 're ĭ'aihâimana u'âsi za'ra wa'aba mono zém na. Tame te za duré marĩ hã ĭwě hã aima sômri za'ra wa'wa. Rowě uptabi hã te za duré aima pisutu za'ra wa'wa. Tawapsi, aima 're rowě uptabi za'ra wa'aba mono di za oto.

⁸⁻⁹ A norĩ wa'wa hã atõmo na asiwi 're 'madâ'â za'ra wa'aba mono ô di, Zezu Cristu hã. Tane nherě, aima sawi uptabi za'ra wa'aba di, Wanhíb'apito hã. Atõmo na asiwi 're 'madâ'â za'ra wa'aba mono ô nherě, te Wanhíb'apito umnhasi sina 're aihâimana za'ra wa'aba mo. Taha wa, aima 're rowě za'ra wa'aba mono wa, te aipě'ě 're, 're atoi u'âsi za'ra wa'aba mo, ato za'ětě za'ra wa'aba na. E marĩ wa. 'Re aihâimana wasété za'ra wa'aba mono zém hawi, te te 're asõ'reptu za'ra wa'aba

mono wa. Taha da, te Wanhib'apito hã asina 're ã'umhãsi za'ra wa'aba mo, te te 're asõ'reptu za'ra wa'aba mono da.

¹⁰ Duréihã aibã norĩ hã te 're hãimana za'ra, 'Re ãhãimana u'ãsi mono zadawa wasu'u 'rata 'wa hã. Ta norĩ hã danho'reptuzé wasu'u te te waihu'u pese za'ra da, ma tô te te sô 're rosa'rata za'ra. ãwana ré ma tô te te dama 're rowasu'u sirõmo za'ra, danho'reptuzém na, 'Re ãhãimana u'ãsi mono za te te aima ãma 're ã'a'uwaĩrami za'ra wa'aba mono zém na.

¹¹ ãne te ta norĩ hã te te sima 're nharĩ za'ra: “E 'wa hã, Danho'reptui'wa za. E niwa te za tawamhã te te 're da'anho'reptu.” ãne te ta norĩ hã te te sô 're rosa'rata pese za'ra, te te waihu'u za'ra da. Cristuhu pẽ'ẽzani hã ãpẽ'ẽ 're, 're hãimana za'ra mono wa, ma tô tãma waihu'u sirõmo za'ra, Cristu hã za te te ãrobzépatazém na. Taha pari, rowẽ uptabi hã hãiwa ãma za tãma 're ãhãimana mono na ma tô duré tãma waihu'u sirõmo za'ra.

¹² 'Re ãhãimana u'ãsi mono, ma tô duré ãne hã tãma waihu'u sirõmo za'ra: “Aima wa'aba si, te waihu'u za'ra wa'aba õ di, danho'reptui'wai wasu'u hã. Ai'uirĩ na wa'aba, za 're ãdahãimana za'ra mono norĩ pibu ma, wa tô ãne hã aima waihu'u sirõmo za'ra wa'wa.” ãne ma tô tãma waihu'u za'ra, aipibu ma za'ra wa'aba zama. Wanhib'apito zadawa wasu'u'wa norĩ hã ma tô oto rowasu'uwẽ na aipo're pu'u za'ra wa'wa, Cristu te te 're ãda'anho'reptui mono zém na. Hãiwa hawi, Wanhib'apito pẽ'ẽzani nhimipawaptobzéb zarina, tô sena Cristuhu wasu'uwẽ na ma tô aipo're pu'u za'ra wa'wa. Taha wasu'u hã wẽ uptabi wa, te oto hãiwa ãma romhuri'wa norĩ hã te te sima 're wẽ

uptabi za'ra, te te 're waihu'u pese za'ra mono da.

'Re ïhâimana u'âsi mono, dahâimana wě da, te te 're ïda'apisutu mono zé wasu'u

¹³ Zezu Cristu hã nimahã na te za wei mo apâ. Taha wa, te za aihâimana nhimiza'rese 're aihâimana za'ra wa'aba mo. Aihâiba na te za 'râwi 're asi'madâ'â za'ra wa'aba mo. Zezu Cristu hã apâ wei morĩ wapsi, te za aima 're ïrowě za'ra wa'aba mono zé hã aima pisutu za'ra wa'wa, hâiwa ãma. Taha zô si te za asina 're asimipari u'âsi za'ra wa'aba mo.

¹⁴ Taha wa, te za 'Re ïhâimana u'âsi mono nhimiroti hã 're ïwapari pese za'ra wa'aba mo. ïsimiroti hã 're waihu'u za'ra wa'aba mono õ ré, ma tô marĩ hã ïwasété zô si 're ïrowasutu za'ra wa'aba mo. Taha zarina 're anomro aba mono õ di za oto.

¹⁵ 'Re ïhâimana u'âsi mono hã ma tô sima aipisutu za'ra wa'wa, ïsib'a'uwě si oto 're anomro aba mono da. Ta hã hâimana wě uptabi na, te 're hâimana. Taha wa, te za a norĩ wa'aba zama, aihâimana wě uptabi na oto 're aihâimana za'ra wa'aba mo, ïsine.

¹⁶ Duréihã ma tô ãne siwasu'u, 'Re ïhâimana u'âsi mono hã:

“Wa hã ïhâimana wě uptabi na, wa 're ïhâimana. Taha wa, a norĩ wa'aba zama te za aihâimana wě uptabi na 're aihâimana za'ra wa'aba aba mo, ïsine.”

Ãne ïsimiroti na rob'ui'éré, ïbaihã na hã.

¹⁷ A norĩ wa'wa hã, 'Re ïhâimana u'âsi mono ma 're aimreme zusi aba mono wamhã, Wamama na te 're ïsisi za'ra wa'aba mo. Ta hã dahâimanazéb zarina da'ãma rowairébé'wa, te 're hâimana. Ãhã wa, 're ïdahâimana za'ra mono zéb zarina, te za dahâiba mono bâ te te dama ãma 're a'uwaimrami,

dahâimana wẽ zém na, dahâimana wasété na zama. Taha wa, te za 're ìhâimana mono zém na asiwi 're ìwazéb za'ra wa'aba mo, Wamama hã, ti'ai ãma 're anomro aba mono ré.

¹⁸ A norĩ wa'wa hã ma tô ìwaihu'u za'ra wa'wa, aiwa'âbâ za'ra wa'aba zé hã. Cristu hã ma tô aiwa'âbâ za'ra wa'wa, 're anomro wasété aba mono zém hawi, te te 're asõ'reptu za'ra wa'aba mono da, aihì'rata norĩ ne, 're aihâimana za'ra wa'aba mono tõi da oto. E rob'uiprazém na ma tô Cristu hã aiwa'âbâ za'ra wa'wa, e êtê'ubuzi pré oru na, niha wamhã, e ì'a na prata na. Mare di. Ta hã wẽ u'âsi 're hâimana za'ra mono õ di za. Taha na te te aiwa'âbâ za'ra wa'aba õ di.

¹⁹ Dazada ìdâ'âzém na si ma tô aiwa'âbâ za'ra wa'wa, ìwapru hã tiwi ìpu'uzém na. Ta hã te 're mo, pone'ërebâ ìwẽ uptabi ne, da te dasiwi ìwĩrĩ da hã, dawasété wa, dawa'âbâzéb da. Cristu hã wẽ uptabi na 're ìhâimana mono hã ma tô tidâ'âzém na aiwasédé hã wa'âbâ za'ra wa'wa. Ta hã te te ìwawa'âbâ za'ra zé hã wẽ uptabi di.

²⁰ 'Re ìhâimana u'âsi mono hã te te ro'apoto mono õ ré, ma tô Cristu hã pisutu siro, dazada dâ'â da, dawasété wa'âbâzéb da hã. ãhãna ro ìsi'utõrĩzéb u hã, ma tô we datême wi oto Cristu hã, aima ãma 're ìrowẽ za'ra wa'aba mono zéb da hã.

²¹ Cristu hã dâ'â uptabi nherẽ, ma tô ab're hawi hâiwa'utu, 'Re ìhâimana u'âsi mono hã, rowẽ uptabi te te tãma pisutu da, hâiwa ãma. ãhã wasu'u hã aima waihu'u pese za'ra wa'aba wa, te oto õhõ si asina 're ì'umnhasi za'ra wa'aba mo, te te dama ìropisutuzé hã te te aima ãma uwaimrami za'ra wa'aba da.

²² Wanhib'apito nhimiroti hã, tô sena. A norĩ wa'wa hã ma tô ìsimiroti hã 're ìwapari pese za'ra

wa'aba mo. Taha wa, marĩ ĩwasété na asima 're rosa'rata za'ra wa'aba mono õ di oto. Aiwẽ na 're anomro aba mono da si, te oto asima 're ĩrosa'rata za'ra wa'aba mo. Dazawizé hã tô sena te oto aima 're hâimana za'ra wa'wa, asiré Wanhíb'apito zazei'wa norĩ ãma. Taha wa, te za õne u'âsi 're asisawi pese za'ra wa'aba mo.

²³ 'Re ĩhâimana u'âsi mono zadawa wasu'u hã pire na te 're hâimana u'âsi. Niwa si'utõrĩ waihu'u õ di za. Ta hã ma tô oto timreme na aipoto téb za'ra wa'wa aipẽ'ẽ 're, ĩ'ra si oto 're anomro aba mono da. Ti'ai ãma damama norĩ si te za nimahã na dawĩ 're si'utõrĩ za'ra. Tanei õ di, Aímama 'wa hã aipẽ'ẽ 're te te 're aipoto téb za'ra wa'aba mono hã. Niwa dame si'utõrĩ waihu'u õ di.

²⁴ Duréihã ma tô ãhã wasu'u na ãma rob'ui'ééré, 'Re ĩhâimana u'âsi mono zadawa wasu'u'wa hã. Æne te rowasu'u:

“Du hã 're wapti'i hã za'ra mono õ ré, te za 're 'ré za'ra. Duré romnhirãã norĩ hã wẽ nherẽ, te za 're sirãã a'a za'ra. Tane duré dahãiba hã wẽ nherẽ, te za 're dasi'utõrĩ su'u.

²⁵ Tanei õ di, uburé Danhíb'apito nhimiroti hã. Pire na te 're hâimana u'âsi. Niwa si'utõrĩ waihu'u õ di za.”

Æne ãma ĩrob'ui'ééré hã.

Tawamhã Wanhíb'apito wasu'uwẽ na da te 're aipo're pu'u za'ra wa'aba mono wamhã, ma tô uburé Danhíb'apito nhimiroti wasu'uwẽ na te te aima 're rowasu'u za'ra wa'wa.

2

¹ Taha wa, te za aiwasédé hã 're ĩrẽme pese za'ra wa'aba mo, dasi'ruiwapari hã, duré dazadawa nhipe hã, duré dahâimanazé tô senai'õ hã, duré

danhimarĩ na dasi'ruiwapari hã, duré dasima dawasu'u wasédé hã.

² Ai'uté ĩpoto té hã tina hãwa'u zô 're ĩ'ry'ry mono ne, te za Wanhib'apito nhimiroti zô 're ĩrob'ruiwapari za'ra wa'aba mo, ãma 're asiptete za'ra wa'aba mono da, aihâimana wasété hawi asô'reptuzé hã 'rãwi oto asina 're waihu'u za'ra wa'aba mono da.

³ Wanhib'apito dama 're ĩsôpru mono zé hã 'rãwi asina 're waihu'u za'ra wa'aba mono wa, wa ãne aima waihu'u za'ra wa'wa.

Ëtê na Cristuhu ãma te te ãma ĩsimir'ézé wasu'u

⁴ Ma'ãpé, Wanhib'apito u asimirosa'rata na si nherê, 're aihutu aba mono. Ta hã wê nherê, ma tô dasiwi wê'ô ni, êne hã 'ri'wa norĩ te te siwi ĩwê'ô ne. Tane nherê, da te dasiwi wê'ô nherê, 'Re ĩhâimana u'âsi mono ma, wê uptabi di, Wanhib'apito hã. Tãma sawi uptabi di duré.

⁵ Êne ahâ nherê, 'ri hã da te dasiwi ãma ĩ'ri ne, te za 'Re ĩhâimana u'âsi mono hã te te aima 're nharĩ za'ra wa'wa, ĩsôrôwa na tãma 're aihâimana u'âsi za'ra wa'aba mono da. E marĩ da. ĩsôrôwa ãma tãma ĩromhuri'wa norĩ ne, sasedoti norĩ ne, tãma ĩromhuri'wa 're aihâimana za'ra wa'aba mono da, duré aihâiba na tãma 're asôprub za'ra wa'aba mono da. Zezu Cristu wazada ĩdâ'âzéb zarina, tãma 're asôprub za'ra wa'aba mono wamhã, Wamama ma wê di, tãma 're ĩ'asôprub za'ra wa'aba mono zé hã.

⁶ Duréihã ĩwana ré 'Re ĩhâimana u'âsi mono, ma tô êtê na Zezu Cristuhu ãma simir'é. ãne te tinha: “Ëtê tãmo wawê hã wa tô pisutu, ĩnhorôwa ãma te hiri da, Si'ã na 'ri nho'ômo nhisi ãma. 'Ri na'rata wê'ézéb ãma wa za tihĩ, 'ri hã siptete

na sab da. Ëne hã ãma wẽ uptabi di. Ìma sawi uptabi di duré. Taha umnhasi sina 're dahâimana za'ra mono wamhã, ãwẽ na za te te dama ãma 're a'uwaimrami u'âsi mono wa, dawi 're robzei'õ za'ra mono õ di za."

Ãne ãma ãrob'ui'ééré hã, ãbaihã na hã.

⁷ Ëtẽ na ãsisi hã aima sawi uptabi za'ra wa'aba di, Cristu hã, Danho'reptui'wa na asina 're umnhasi za'ra wa'aba mono wa. Da te dasina 're ã'umnhasi za'ra mono õ nori ãma, ma tô 'ri'wa nori ãma simiré'é, 'Re ãhâimana u'âsi mono zadawa wasu'u'wa hã. ãne te ta nori ãma rowasu'u:

"Ëtẽ tomhãpã wẽ hã 'ri na'ratazéb da hã, wẽ uptabi nherẽ, wasété newa, 'ri'wa nori te te aré siwi ãwẽ'õ hã 'ri na'rata uparizéb da, te oto 're sa'wari u'âsi, pire na."

Ãne ãwasu'u na rob'ui'ééré hã.

⁸ Duré ãtẽ tõmo wawẽ wasu'u amo na rob'ui'ééré hã, ãne:

"Ëne hã te za nasi da'marõpãri za'ra."

Taha na rob'ui'ééré hã, ãne. Ëne te te nasi da'marõpãri za'ra wamhã, dama 're rowẽ za'ra mono õ di za. Tane Cristuhu wasu'u'wẽ hã da te 're saze za'ra mono õ wamhã, dama 're rowẽ za'ra mono õ di za, 'Re ãhâimana u'âsi mono hã te te siwi 're ãda'awẽ'õ mono zéb zarina.

⁹ Tanei õ di, a nori wa'wa hã. 'Re ãhâimana u'âsi mono, ma tô sima aipisutu za'ra wa'wa, ãsib'a'u'wẽ si oto 're anomro aba mono da. Sasedoti nori hã te te sima 're ã'apisutu mono ne, te oto a nori wa'wa hã uburé Danhib'apito ma romhuri'wa, 're anomro aba mo, õhõ ãma si 're anomro aba mono da, ãte da. Ta hã robra hawi ma tô rowa'a u sitẽme asõ tihãrã za'ra wa'wa, 're anomro wasété aba mono

zém hawi, rowē uptabi na si 're anomro aba mono da oto. Taha wasu'u na, tiwaihu'u pese na te te aima āma 're ĩ'uwaimrami wē za'ra wa'aba mono zém na, ma tō sima aipisutu za'ra wa'wa, āma 're dapo're pu'u u'āsi za'ra wa'aba mono da.

¹⁰ A norĩ wa'wa hã 'Re ĩhâimana u'āsi mono nhib'a'uwē 're anomro aba mono ò di aré. Āhãna te oto ĩsib'a'uwē tãma 're aihâimana za'ra wa'aba mo. Duré da'āma 're ĩpē'ēzé mono zé hã asina 're waihu'u za'ra wa'aba mono ò di aré. Āhãna ma tō oto asina ĩwaihu'u za'ra wa'wa, da'āma 're ĩpē'ēzé mono zé hã.

Dahâimana wē zém na rowasu'u

¹¹ ĩsisānawã norĩ, ĩma asawi pese za'ra wa'aba norĩ hã, darom nhiti 're ĩdahâimana za'ra mono ne, te 're aihâimana za'ra wa'aba mo, ti'ab ré. Taha wa, marĩ wasété na 'rãwi asima 're rosa'rata za'ra wa'aba mono ò di za, asimirosa'rata wasété zarina 're 'manharĩ za'ra wa'aba mono tō da, aiwasété 'wa hã.

¹² A norĩ wa'wa hã Wanhib'apito zazei'õ'wa norĩ wazari, te 're aihâimana za'ra wa'aba mo. Taha wa, te za aihâimana wē na si dama 're aihâimana za'ra wa'aba mo. Tawamhã aihâimana wasété na, taré da te aima 're nharĩ za'ra wa'aba mono nherē, te za da te 're aiwaihu'u za'ra wa'wa, dama 're aihâimana wē za'ra wa'aba mono zém na. Tawamhã Cristu hã apã wei morĩ wapsi, te za 'Re ĩhâimana u'āsi mono āma tawata za'ra ni, ĩsimiroti zarina aihâimana wē na, dama 're aihâimana za'ra wa'aba mono wa.

¹³ Wanhib'apito nhib'a'uwē oto 're anomro aba mono wa, uburé dama ĩpire norĩ nhimiroti hã te za 're ĩwapari pese za'ra wa'aba mo. Taha wa, ti'ai āma

danhipai u da'madâ'â'wa nhimiroti hã te za duré 're ïwapari pese za'ra wa'aba mo.

14 Duré tãma da'madâ'â'wa da, te te 're ïda'apisutu mono norĩ nhimiroti zama, te za 're ïwapari pese za'ra wa'aba mo. Ìhâimana wasété norĩ hã, ïsadawa para te te 're hã za'ra mono da, duré ïhâimana wẽ norĩ ãma 're wata za'ra mono da, taha da, ma tô ta norĩ hã pisutu za'ra.

15 'Re ïhâimana u'âsi mono hã ma tô sima aiwẽ za'ra wa'wa, aihâimana wẽ na dama 're aihâimana za'ra wa'aba mono da. E marĩ da. Aihâimana wẽ na dama 're aihâimana za'ra wa'aba mono nherẽ, taré da te aima 're nharĩ wasété za'ra wa'aba mono tô da.

16 Pawa'âbâ ãna dama romhuri'wa norĩ ne, robzei'õ na 're aihâimana za'ra wa'aba mono õ di oto, a norĩ wa'wa hã. Tane nherẽ, Cristuhu ãma rowẽ na 're anomro aba mono nherẽ, ãne taré 'rãwi asi'ãma 're rosa'rata za'ra wa'aba mono õ di za: Ìwasédé te 're 'manharĩ mono nherẽ, rowẽ u'âsi wa za 're ïhâimana. ãne taré 'rãwi asi'ãma 're rosa'rata za'ra wa'aba mono õ di za. 'Re ïhâimana u'âsi mono ma romhuri'wa, 're aihâimana za'ra wa'aba mono wa, te za aihâimana wẽ na 're aihâimana za'ra wa'aba mo.

17 ãne wa, te za dahâiba mono bâ 're ïdahâiba wazéb za'ra wa'aba mo. Uburé asiré ïsazei'wa norĩ hã te za 're ïsawi pese za'ra wa'aba mo. 'Re ïhâimana u'âsi mono hã te za duré asima 're ïpipa za'ra wa'aba mo, ïwaihu'u pese uptabi na. Duré ti'ai ãma danhipai u da'madâ'â'wa hã te za asiwi 're ïhâiba wazéb za'ra wa'aba mo.

Pawa'âbâ õ nherẽ, romhuri'wa norĩ hã 're ïnomro wẽ mono zé wasu'u

18 Aiwada'uri zarina aipawa'âbâ âna dama romhuri'wa norĩ, asib'apito nhimiwada'urizé hã te za 're ĩwapari pese za'ra wa'aba mo, ĩsimizawi pese norĩ mreme hã, duré ĩsimizawi'ô norĩ mreme zama.

19 Taré nherẽ, da te aima 're rob'manharĩ za'ra wa'aba mono wamhã, te za 're ĩrobzépata za'ra wa'aba mo. Âne wamhã, ari'iwi te za 're aihâimana za'ra wa'aba mo, taha da, te te sima 're aiwẽ za'ra wa'aba mono wa, 'Re ĩhâimana u'âsi mono hã. Âne zarina te za te te 're aiwẽsãmri za'ra wa'wa.

20 Marĩ hã 're 'manharĩ wasété za'ra wa'aba mono wa, da te 're aihã za'ra wa'aba mono wamhã, ari'iwi 're aihâimana za'ra wa'aba mono nherẽ, e te za ai'âma 're dawata za'ra wa'wa. Mare di. Aihâimana wẽ na dama 're aihâimana za'ra wa'aba mono nherẽ, da te aima 're rob'manharĩ za'ra wa'aba mono wamhã, ari'iwi te za 're ĩsépata za'ra wa'aba mo. Tawamhã, 'Re ĩhâimana u'âsi mono si te za te te 're aiwẽsãmri za'ra wa'wa.

21 Cristu hã ma tô robzépata, asada za'ra wa'aba. Ta hã ma tô âne na aima âma asanho za'ra wa'wa, ĩsirã zarina si ari'iwi 're robzépata za'ra wa'aba mono da. Taha da, ma tô sitême asô tihârâ za'ra wa'wa, 'Re ĩhâimana u'âsi mono hã.

22 Cristu hã marĩ na tiwasédé te te 'manharĩ ô uptabi di. Tô sena na te te dama 're rowasu'u mono wa, sadawa nhipese na da te 're wapari mono ô di, dasiwi.

23 Da te tâma 're nharĩ wasété za'ra mono nherẽ, asa te te dama âma 're nharĩ wasété mono ô di. Duré da te tâma ĩrob'manharĩ wasété mono na te te robzépata mono nherẽ, te te dama ropipa ô di asa. 'Re ĩhâimana u'âsi mono ma si, ma tô sisõ, taha si dahâimanazéb zarina da'âma rowairébé'wai wa, te

te ãma dama 're a'upai mono õ wa.

²⁴ Cristu hã wedepo'o nnonhi'rãmi na dâ'â wamhã, ma tô wawasété wa, wawa'âbâ za'ra, wawasédé hã wa te oto 're 'manharĩ tã za'ra mono da, wahâimana wẽ na si oto 're wahâimana za'ra mono da. Ìhâiba na da te tãma Ìrob'manharĩ wasétézém na, ma tô robzépata za'ëtê. Taha zarina, a norĩ wa'wa hã rowẽ na te oto 're aihâimana za'ra wa'aba mo.

²⁵ Rowẽ na 're aihâimana za'ra wa'aba mono õ di aré, pone'ërebâ, bådâdi nhiti 're Ìsipa za'ra mono ne, 're anomro aba mono wa aré. ãhãna ma tô apâ aipizari za'ra wa'wa, Da'madâ'â wẽ 'wai u, Ìsarina si oto 're anomro aba mono da, rowẽ na.

3

Damro ré norĩ hâimanazé wasu'u

¹⁻² Pi'õ norĩ, romhuri'wa norĩ hã tinhib'apito mreme te te 're Ìwapari pese za'ra mono ne, te za duré aimro mreme hã 're Ìwapari pese za'ra wa'aba mo. ãté aimro za'ra wa'wa hã zahadu te te saze za'ra õ di, 'Re Ìhâimana u'âsi mono nhimiroti hã. Tane nherẽ, tãma 're aihâimana wẽ za'ra wa'aba mono zéb zarina, te za oto sima wẽ za'ra, Cristuhu zazei'wa oto 're hâimana za'ra mono da. Te te 're saze za'ra mono da, tãma 're roti za'ra wa'aba mono õ nherẽ, te za uihâ na te te 're saze za'ra. E marĩ wa. Tãma 're aihâimana wẽ za'ra wa'aba mono wa, duré Ìmreme hã 're wapari pese za'ra wa'aba mono wa.

³⁻⁴ Asima 're asipese za'ra wa'aba mono na si, 're asõpré wa'aba mono õ di za, ai'rãi waipo Ìwẽ na, duré asõ'rebzu Ìwẽ na. Duré ai'uza Ìwẽ na 're rosa'rata za'ra wa'aba mono õ di za. Asimirosa'rata wẽ na oto 're Ì'anomro aba mono

zéb zô si, te za asima 're asôpré wa'aba mo, duré aiwaimri 're ã'aihâimana za'ra wa'aba mono zéb zô zama. ãne si tãma wẽ uptabi di, 'Re ãhâimana u'âsi mono ma hã.

⁵ ãne si ma tô wahi'rata sipi'õ norĩ hã 're nomro, 're ãhâimana wẽ za'ra mono norĩ hã. 'Re ãhâimana u'âsi mono si, ma tô ta norĩ hã te te sina 're umnhasi za'ra, te te 're pawapto wẽ za'ra mono da. 'Re ãnomro wẽ mono na, ma tô duré ta norĩ hã sina 're sôpré. Taha wa, ma tô timro mreime si te te 're wapari pese za'ra.

⁶ ãne Sara hã ma tô 're mo. Timro mreime hã ma tô te te 're wapari pese, Abra'ãhã mreime hã. Taha wa, ma tô tinhib'apito na te te 're sisi Sara hã, Abra'ã hã. Tane te za duré a norĩ wa'wa hã aimro ma 're aihâimana wẽ za'ra wa'aba mo. Asina aihâtã'ã ãna, te za duré 're anomro aba mo. Tawamhã Saraha nhihudu na te za te te 're asisi za'ra wa'wa, 'Re ãhâimana u'âsi mono hã.

⁷ Duré aibã norĩ, aimro siré te oto 're aihâimana za'ra wa'aba mo. A norĩ wa'wa hã aibã wa, aihãiba hã siptete za'ra wa'aba di, aimro hãiba za'ra wa'aba ma hã. ãne hã te za asina ãwaihu'u za'ra wa'wa. Taha wa, te za aimro ma 're aihâimana wẽ za'ra wa'aba mo. Rowẽ ãsi'utõrĩ'õ hã te za 'Re ãhâimana u'âsi mono hã aima sômri za'ra wa'wa, hãiwa ãma. Aimro norĩ wa'aba ma zama, te za sômri za'ra. Taha wa, te za aimro ma 're aihâimana wẽ za'ra wa'aba mo. Tawamhã 'Re ãhâimana u'âsi mono ma, asiré 're aimreime zusi aba mono wamhã, te za te te 're ai'awapari 'wa, Wamama hã.

Ïsazei'wa norĩ, dama 're hãimana wẽ za'ra mono nherẽ, te te 're ãrobzépata za'ra mono zé wasu'u

⁸ Īmreme na wa za oto aima 'rāsutu za'ra wa'wa. Asimirosa'rata wē na te za aihīni 're asisazei pese za'ra wa'aba mo. Duré dapē'ēzé zarina da te 're robzépata za'ra mono wamhã, te za dasiré aipē hã 're ĩsépata za'ra wa'aba mo, aipē'ēzé sina. Duré uburé marĩ wē na dama 're rowē za'ra mono wa, 're dato za'ra mono wamhã, te za dasiré 're ato za'ra wa'aba mo. Te za duré 're asisawi pese za'ra wa'aba mo. Asima aipire na 're aihâimana za'ra wa'aba mono õ di za.

⁹ Duré asada 're dahâimana wasété za'ra wa'aba mono wamhã, asa dama ãma 're wa'rãmi za'ra wa'aba mono õ di za, aihâimana wasété na. Duré dapē'ē na taré da te 're ai'ruiwapari za'ra wa'aba mono wa, da te aima 're nharĩ za'ra wa'aba mono nherē, asa dama ãma 're wa'rãmi za'ra wa'aba mono õ di za, aimreme wasété na hã. Wamama wi si, te za ta norĩ ma 're ĩwaptērē za'ra wa'aba mo, ĩwē si te te tãma 're sômri za'ra mono da, ta norĩ ma. ãne da, ma tō Wamama hã sitēme asō tihârâ za'ra wa'wa, ĩwē na si aima 're sōprub za'ra wa'aba mono da.

¹⁰ Duréihã ãne na ma tō 'Re ĩhâimana u'âsi mono zadawa wasu'u'wa hã dama roti:

“Aihâiba ré ré, robzei u'âsi 're anomro aba mono da, asima 're wē za'ra wa'aba mono wamhã, aimreme wasété na dama 're nharĩ za'ra wa'aba mono õ di za. Duré dama 're asadawa nhipse za'ra wa'aba mono õ di za.

¹¹ Te za duré aiwasété wi 're aipizari za'ra wa'aba mo, ĩwē si dama 're 'manharĩ za'ra wa'aba mono da oto. Duré rowē na si asiré 're aihâimana za'ra wa'aba mono da si, te za asina 're ĩrosa'rata pese za'ra wa'aba mo.

¹² Hâimana wē na dama 're ĩhâimana za'ra mono

norĩ si, te za te te 're ab'madâ'â pese, 'Re ãhâimana u'âsi mono hã. Te te duré tiwi 're rowaptêrẽ za'ra mono wamhã, te za te te 're awapari, ãmreme zarina te te tãma ãma 're a'uwaimrami mono da. Tane nherẽ, dahâimana wasété na dama 're dahâimana za'ra mono wamhã, te za dazada 're hâimana.”

Ãne ãma ãrob'ui'ééré hã, ãbaihã na hã.

¹³ A norĩ wa'wa hã 're anomro wẽ wa'aba mono da, tô sena asina 're rosa'rata za'ra wa'aba mono wamhã, e 'wa hã te za rowasédé hã te te aima 're 'manharĩ za'ra wa'wa.

¹⁴ Tane nherẽ, dama 're aihâimana wẽ za'ra wa'aba mono nherẽ, taré da te aima 're rob'manharĩ wasété za'ra wa'aba mono wamhã, dama 're aipahi za'ra wa'aba mono õ di za. Asimirosa'rata na 're aihâtâ'â za'ra wa'aba mono õ di za duré.

¹⁵ Cristu hã Asib'apito aima 're hâimana za'ra wa'aba mono wa, te za aihâimana prédup sina 're ãwapari pese za'ra wa'aba mo. Duré Cristu 're ãsaze za'ra wa'aba mono zém na, da te 're asadhanharĩ za'ra wa'aba mono wamhã, awa'awi te za dama 're asiwasu'u waré za'ra wa'aba mo.

¹⁶ Aiwaimri te za 're asiwasu'u za'ra wa'aba mo, aimreme wasété ãna. Aihâimana wẽ na te za dama 're aihâimana za'ra wa'aba mo, asimirosa'rata wasété na 'rãwi 're asiwẽ'õ za'ra wa'aba mono tã da. Tawamhã dama 're aihâimana wẽ za'ra wa'aba mono wamhã, Cristuhu zazei'wa 're aihâimana za'ra wa'aba mono 'ru te, taré da te aima 're nharĩ wasété za'ra wa'aba mono nherẽ, te za damreme niwĩ 're danhiséb za'ra.

¹⁷ Ãté 're aihâimana wẽ za'ra wa'aba mono 'ru te, te za da te aima 're rob'manharĩ wasété za'ra

wa'wa. ãne zarina, 're robzépata za'ra wa'aba mono wamhã, te za ãwaihu'u za'ra wa'wa, 'Re ãhâimana u'âsi mono te te sima 're aiwẽ za'ra wa'aba mono zéb zarina, a'â 're ãrobzépata za'ra wa'aba mono na. ãne hã te te wama 're awẽ mono õ di, dama 're ãwahâimana wasété za'ra mono zéb da hã. Dama 're wahâimana wasété za'ra mono wamhã, áté te za da te 're wahâ za'ra. ãne zarina, wa te 're robzépata za'ra mono wamhã, ã'uwaibaba wa za tô wa te 're robzépata za'ra.

¹⁸ Misi haré ma tô Cristu hã dazada dêrã, 're ãdahâimana wasété za'ra mono hawi, te te 're da'anho'reptui mono da. 'Re ãmorĩ wẽ uptabi hã ma tô dêrã, 're ãdanomro wasété mono norĩ da, te te 're wa'anhimroi mono da, 'Re ãhâimana u'âsi mono u. Cristu hã dê'ã uptabi nherẽ, ma tô ãmama hã hãiwa'utu, apã 're hãimana u'âsi mono da.

¹⁹ Tihãiba na u'âsi, te adã'ã norĩ u mo, dazazéb 're, 're ãdasimasa mono ne, nimomo 're ãwairébé mono õ norĩ u. Uburé Danhib'apito uptabi na te te sina po're pu'u za'ra da, te ãtẽme timorĩ za'ra.

²⁰ Ta norĩ hã Nowé ti'ai ãma 're morĩ ré, te te 're wapari za'ra mono õ di, 'Re ãhâimana u'âsi mono nhimiroti hã. Nowé hã 'ri ne uba're, te te 'manharĩ ré, te ta norĩ hã po're ãna 're nomro. Tane nherẽ, da'ãma wa'a su'u õ wa, te te da'uprosi su'u õ di, 'Re ãhâimana u'âsi mono hã. Te te oto da'uprosi wamhã, 'ri ne uba're wa, ãsisisi norĩ si, ma â wi sõ'reptu za'ra. Ta norĩ hã umro za'ra di. 8 na ãhãiba za'ra hã.

²¹ Ta hã â hã, â dawabzuri, te wasu'u, danho'reptuzé. E da'u're wa, da'upsõzé, te â dawabzuri hã wasu'u. Mare di. 'Re ãhâimana u'âsi mono ma, da te dasi'ãma 're ãropisutu za'ra mono zé

te wasu'u, â dawabzuri hã. Dawasédé te te dama 're apari mono wa, 'râwi 're dasiwaihu'u za'ra mono õ di oto, dawasété na hã. Taha wa, dama 're ãrowê za'ra mono zéb zarina, te za oto dasina da te tãma 're ropisutu za'ra, ãma 're ãdanomro mono zéb da hã. Zezu Cristu hã dâ'â uptabi nherê, Ìmama hã ab're hawi te te hãiwa'utu wa, apâ 're morĩ wa, te asõ'reptuzé hã aima tihâimana za'ra wa'wa.

²² Cristu hã hãiwa u morĩ wa, te oto pire na Timama nhimire niwĩ 're sãmra, Danho'reptui'wa hã. 'Re ãhâimana u'âsi mono ma romhuri'wa norĩ 'madâ'â'wa, te 're hãimana. Uburé hãiwa nho're ãma, pire na duré waihu'u pese na 're ãhâimana za'ra mono norĩ ma zama, te pire uptabi na tãma 're hãimana za'ra.

4

'Re ãdanomro mono zép tém na rowasu'u

¹ Cristu hã ma tô tihâiba na robzépata. Taha wa, te za asina 're asiptete za'ra wa'aba mo, asihâiba zawĩ ãna, ãsine 're ãrobzépata za'ra wa'aba mono zéb da hã. ãne, da te 're robzépata za'ra mono wamhã, marĩ, da te 're ãmanharĩ wasété za'ra mono zé hã, te za oto da te 're rême pese za'ra.

² Taha wa, ti'ai ãma 're aihâimana za'ra wa'aba mono ré, te za 're aihâimana wê za'ra wa'aba mo, 'Re ãhâimana u'âsi mono te te sima 're ãwê mono zéb zarina si. Duré marĩ na asima 're ãrosa'rata wasété za'ra wa'aba mono zéb zarina, 're aihâimana za'ra wa'aba mono õ di za oto.

³ Wahub ahã na ma tô ai'ãma 're si'utõrĩ za'ra wa'wa, 'Re ãhâimana u'âsi mono nhimiroti waihu'u'õ'wai hãimanazém na, 're aihâimana wasété za'ra wa'aba mono ré. Ma tô asisô 're ãrowasutu

za'ra wa'aba mo aré. Âzézei'wa te aré 're anomro aba mo. Duré dato ĩwě'õre hã 're 'manharĩ za'ra wa'aba mono ré, ma tô asina 're asipsaihuri za'ra wa'aba mo aré. Duré âzézei'wa 're aihâimana za'ra wa'aba mono wa, ma tô ai'rã siwamnarĩ na 're aihâimana za'ra wa'aba mo. Duré 'Re ĩhâimana u'âsi mono upana, ma tô romhâiba 'manharĩ âma 're aiwata za'ra wa'aba mo, ta hã waihu'u pese newa rob'manharĩ hã.

⁴ 'Re anomro wasété aba mono zé hã, tâibâ oto. Taha wa, siwa'ru dasiré 're aihâimana za'ra wa'aba mono õ wa, te ai'âma 're tob'uzu za'ra wa'wa, Wamama nhimiroti waihu'u'õ'wa norĩ hã. Taha wa, 're aihâimana wě za'ra wa'aba mono 'ru te, te oto ta norĩ hã taré te te aima 're nharĩ wasété za'ra wa'wa.

⁵ Tane nherě, nimahã na ta norĩ hã 're ĩhâimana wasété za'ra mono zém na te te ĩwaihu'u za'ra zéb zarina, te za ta norĩ ma rowairébé za'ra, 'Re ĩhâimana u'âsi mono hã. Ta hã te te ĩda'awaihu'uzéb zarina, te za romhutu na uburé norĩ ma rowairébé, ĩhâiba ré norĩ ma, 're ĩdâ'â za'ra mono norĩ ma zama.

⁶ Taha wa, dahâimanazém na za te te dama 're arowairébé mono wa, ma tô Wanhib'apito zadawa wasu'u'wa norĩ hã Cristuhu wasu'uwě na te te 're dapo're pu'u za'ra, da te âma 're saze za'ra mono da. Ta norĩ wapari'wa norĩ hã ma tô oto tidâ'â za'ra. Ti'ai âma 're nomro mono ré, ma tô ĩwasété na wě'õ za'ra, 'Re ĩhâimana u'âsi mono hã, uburé 're ĩdahâimana za'ra mono norĩ hã ĩwasété na te te 're ĩ'awě'õ mono ne. Tane nherě, hâiba ré 're nomro mono ré, ma tô Wanhib'apito zadawa wasu'u'wa norĩ hã Cristuhu wasu'uwě na po're pu'u za'ra, ta norĩ hã rowě ĩsi'utõrĩ'õ âma 're hâimana u'âsi za'ra mono da, 'Re ĩhâimana u'âsi mono ne.

Re dasipawaptob za'ra mono da, dama ĩrotizé

⁷ Ro ĩsi'utōrĩzéb u hã, romhuture di oto. Taha wa, te za aihâiba na asina 're asiptete za'ra wa'aba mo. Duré aihâimana nhimiza'rese te za 're aihâimana za'ra wa'aba mo, 'Re ĩhâimana u'âsi mono ma, 're aimreme zusi u'âsi aba mono da.

⁸ Dazawizé wasu'u si, ĩpire uptabi hã. Taha zarina si, 're asisawi pese za'ra wa'aba mono sina, te za 're aihâimana za'ra wa'aba mo. E marĩ da. Dazawizé hã aima 're hâimana za'ra wa'aba mono wa, dawasédé hã da'ãma 're 'madâ'â za'ra wa'aba mono tō da, ahâ nherẽ, da te 're 'manharĩ za'ra mono nherẽ, dawasédé hã.

⁹ Te za duré 're ĩda'mazasi su'u za'ra wa'aba mo ari'ĩwi, 're dawata'ẽ za'ra wa'aba mono ãna.

¹⁰ 'Re ĩhâimana u'âsi mono hã sōpru wa, ma tō aihâiba mono bâ dama 're ĩromhuri za'ra wa'aba mono zéb da hã, aima sōmri za'ra wa'wa, sipu'u pese na. Taha zarina si, te za oto dama ãma 're ĩ'uwaimrami za'ra wa'aba mo.

¹¹ Tawamhã dama 're rowahutu za'ra wa'aba mono wamhã, duré dama 're roti za'ra wa'aba mono wamhã, timreme te te aima 're ĩsōmri za'ra wa'aba mono na si, te za dama 're ĩrowasu'u za'ra wa'aba mo. Duré aihâiba na zama 're dapawaptob za'ra wa'aba mono wamhã, 'Re ĩhâimana u'âsi mono, tinhiptede te te aima 're ĩsōmri za'ra wa'aba mono na, te za 're ĩdapawaptob za'ra wa'aba mo. ãne na hã te za dama ãma 're ĩ'uwaimrami za'ra wa'aba mo, 'Re ĩhâimana u'âsi mono ãma 're dawata za'ra mono da, Zezu Cristuhu nhib'a'uwẽ 're aihâimana za'ra wa'aba mono wa, dama ãma 're ĩ'uwaimrami za'ra wa'aba mono zém na. 'Re ĩhâimana u'âsi mono hã wẽ uptabi wa, duré waihu'u pese uptabi wa, wa za ãma 're wawata

u'âsi za'ra.

Wanhib'apito zazei'wa norĩ te te 're ĩrobzépata za'ra mono zé wasu'u

¹² ĩsiwadi norĩ, ĩma asawi pese za'ra wa'aba norĩ hã, ãhãna rowasédé hã da te aima 're 'manharĩ za'ëtē za'ra wa'aba mono wa, te a'â 're ĩrobzépata za'ra wa'aba mo. Tane nherē, 're ĩrobzépata za'ra wa'aba mono zém na ãma 're atob'uzu za'ra wa'aba mono õ di za, da te aima 're rob'manharĩ za'ëtē za'ra wa'aba mono õ newa.

¹³ Cristu hã aiwana za'ra wa'aba, ma tô robzépata za'ëtē. Taha wa, ĩsine 're robzépata za'ra wa'aba mono wa, te za aipē'ē 're, 're ato za'ra wa'aba mo. E marĩ wa. Cristu hã tiwaihu'u pese na apâ wei morĩ wapsi, za ato za'ēne hã aima 're hâimana za'ra wa'aba mono wa.

¹⁴ Áté Cristuhu ãma si 're aihâimana za'ra wa'aba mono 'ru te, te za da te aima 're nharĩ wasété za'ra wa'wa. Tane nherē, aima 're rowē za'ra wa'aba mono di za. E marĩ wa. 'Re ĩhâimana u'âsi mono pē'ēzani hã aipē'ē 're aima 're hâimana za'ra wa'aba mono wa oto, rowē uptabi zé hã.

¹⁵⁻¹⁶ Cristuhu zazei'wa oto 're anomro aba mono nherē, 're danhimroi wa'aba mono õ di za. Duré marĩ na dawĩ 're asipsaihuri za'ra wa'aba mono õ di za. Duré marĩ na dawĩ 're ro'wa'rutu za'ra wa'aba mono õ di za. Duré danhimirosa'rada hã dawĩ 're 'wa'rutu za'ra wa'aba mono õ di za. Áté nimahã na dama 're aihâimana wasété za'ra wa'aba mono wamhã, te za da te aima 're rob'manharĩ wasété za'ra wa'wa. Āne zarina, 're robzépata za'ra wa'aba mono wamhã, ĩ'uwaibaba te za tô 're ĩrobzépata za'ra wa'aba mo. Tane nherē, Cristuhu zazei'wa 're anomro aba mono 'ru te, 're robzépata za'ra wa'aba mono wamhã, 're aséb

za'ra wa'aba mono õ di za. Cristuhu zazei'wa na, da te 're asisi za'ra wa'aba mono wẽ te, te za 'Re ãhâimana u'âsi mono ãma si 're aiwata za'ra wa'aba mo.

¹⁷ Bâdâ hã ma tô oto ãwa waptãrã, 'Re ãhâimana u'âsi mono hã te te dama ã'arowairébézéb da hã, ta hã dahâimanazém na dawaihu'u'wa 're hâimana mono wa. Taha wa, te za a'ã tinhib'a'uwẽ norĩ ma arowairébé, 're ãwahâimana za'ra mono zém na, te te wa'awaihu'u wa. Tawamhã e niha za ãsazei'õ'wa norĩ ma te te ãrowairébézé hã. Wanhib'apito wasu'uwẽ na, 'Re ãhâimana u'âsi mono, we te te dama ãwaihu hã te te ãma saze za'ra õ wa dame, ta norĩ ma, 're rowẽ za'ra mono õ di za.

¹⁸ Duréhã ãhã wasu'u na ma tô ãne na dama rowasu'u, 'Re ãhâimana u'âsi mono zadawa wasu'u'wa hã:

“Áté marĩ ahã na te za sada 're hâimana za'ra, 're ãnomro wẽ mono norĩ zada hã, tinho'reptuzé hã te te sina 're uwaimrami za'ra mono õ ré. Tawamhã e niha te za tãma 're romhâimana za'ra, 'Re ãhâimana u'âsi mono wẽ'õ'wa norĩ ma hã, siwa'ru 're ãhâimana za'ra mono norĩ ma hã.”

Ãne ta norĩ wasu'u na rob'ui'ééré hã, ãbaihã na hã.

¹⁹ Áté wa za a'ã robzépada hã wa te wasina 're 'madã'ã za'ra, 'Re ãhâimana u'âsi mono te te wama 're ã'awẽ mono zéb zarina. Tane nherẽ, 'Re ãhâimana u'âsi mono, wa'apoto mono 'wai umnhasi sina, wa za dama 're wahâimana wẽ za'ra, ta hã tinhimiropisutu wẽ na za te te wama ãma 're a'uwaimrami u'âsi mono wa.

5

Wanhib'apito zazei'wa 'madã'ã'wa norĩ ma

rowasu'u

¹ Da'madâ'â'wa norĩ, ãhãna wa za aima ĩsiwasu'u za'ra wa'wa. Wa hã da'madâ'â'wa, wa duré 're ĩhãimana. Cristu hã te te robzépata wamhã, wa tô ĩtõmo na 'madâ, te te ĩrobzépatazé hã. Wa hã wa za duré ĩsazei'wa norĩ siré, rowē uptabi hã ĩsina waihu'u hãiwa ãma, rowē uptabi hã sō'awi te te wama pisutu za'ra wapsi, Wanhib'apito hã.

² Taha wa, wa za aima waihu'u za'ra wa'wa, 'Re ĩhãimana u'âsi mono hã tinhib'a'uwē te te aima 're ĩpisutu za'ra wa'aba mono hã ato sina tãma 're pawaptob za'ra wa'aba mono da, tãma 're aiwa'a za'ra wa'aba mono ãna. ãne da, ma tô sima aiwē za'ra wa'wa, Wamama hã. Rob'uiprazéb zô tãma 're dapawaptob za'ra wa'aba mono õ di za. Tô sena asima 're ĩwē uptabi za'ra wa'aba mono zéb zarina si, te za tãma 're ĩdapawaptob za'ra wa'aba mo.

³ Asimi'madâ'â' za'ra wa'wa hã tãma 're 'madâ'â' pese za'ra wa'aba mono da, ma tô aipisutu za'ra wa'wa, 'Re ĩhãimana u'âsi mono hã. Taha wa, a norĩ wa'wa hã dama aipire wē te, 're dawada'uri za'ra wa'aba mono õ di za. Asimipawapto wē na te za tãma ãma 're asanho wē za'ra wa'aba mo, asimi'madâ'â' za'ra wa'aba norĩ ma.

⁴ Tawamhã Da'madâ'â'wai uptabi hã apâ wei morĩ wapsi, tãma 're ĩdapawapto wē za'ra wa'aba mono zé wa'rãmi, te za oto aima wa'âbâ za'ra wa'wa, ĩwē uptabi na, ĩsi'utõrĩ'õ na oto aima 're hãimana u'âsi za'ra wa'aba mono da.

⁵ ĩpréduptém norĩ, ĩprédum norĩ mreme si te za 're ĩwapari pese za'ra wa'aba mo. ĩsazei'wa norĩ, aihĩni te za romhuri na 're asipawaptob za'ra wa'aba mo, aipire na 're asi'madâ'â' za'ra wa'aba mono ãna.

Durêihã ãne na ma tô rob'ui'ééré, 'Re ãhâimana u'âsi mono zadawa wasu'u'wa hã:

“Dapire na 'râwi 're ãdasi'madâ'â za'ra mono norĩ da si, te za 're hâimana, 'Re ãhâimana u'âsi mono hã. Dapire na 'râwi da te dasi'ãma 're ãrosa'rata za'ra mono õ norĩ si, te za te te 're apawaptob u'âsi.”

Ãne ãma rob'ui'ééré hã, ãbaihã na hã.

⁶ Ãhã wa, te za Wamama ma 'râwi aiwapu na 're asi'madâ'â za'ra wa'aba mo, taha si waihu'u pese uptabi na 're hâimana mono wa. Ãne wamhã, bådã te te ai'ãma sima ãpisutuzém na, te za ai'ãma uwaimrami za'ra wa'wa, aipire na oto dama 're aihâimana za'ra wa'aba mono zéb da hã.

⁷ 'Re ãhâimana u'âsi mono hã te te 're ai'madâ'â wẽ za'ra wa'wa. Taha wa, marĩ na 're aihâtã'â za'ra wa'aba mono wamhã, te za tãma 're asi-wasu'u za'ra wa'aba mo, marĩ na 're ã'aihâtã'â za'ra wa'aba mono zéb zarina. Taha parimhã, ãma 're rosa'rata za'ra wa'aba mono õ ãi za oto, marĩ na 're ã'aihâtã'â za'ra wa'aba mono ãma hã.

⁸ Ma'ãpé, aihâimana nhimiza'rese sina 're aihâimana za'ra wa'aba mono. Duré 're asi'madâ'â pese za'ra wa'aba mono. E marĩ wa. Da'rui'wa hã datême 're morĩ wa, wa'uburé norĩ nhib'apito hã. Hu'u zéré pa hã wairõ sina, tisa zô 're ãnomro mono ne, te datême 're morĩ u'ã, Wanhib'apito si da te ãsina 're ã'madã'ã u'âsi za'ra mono zé hã te te ãawi 're a'uprosi mono da.

⁹ Asiré Wanhib'apito zazei'wa norĩ hã daro mono bã 're hâimana za'ra mono 'ru te, da te tãma 're ãrob'manharĩ za'ra mono zém na, te a'ã te te 're robzépata za'ra, asine za'ra wa'aba. Ã norĩ wasu'u hã ma tô ãwaihu'u za'ra wa'wa. Taha wa,

Wanhib'apito umnhasi sina te za 're aihâimana za'ra wa'aba mo, da'rui'wai wi asina 're asiptete u'âsi za'ra wa'aba mono sina.

¹⁰ Tane nherê, 're robzépata hâ za'ra wa'aba mono õ ré, rowêzé hã te za te te aima âma 're a'uwaimrami 'wa, 'Re ãhâimana u'âsi mono hã. Taha si te za te te 're asiptete u'âsi za'ra wa'wa, tiwaihu'u pese na, asiptete u'âsi âma 're aihâimana za'ra wa'aba mono da. Ôhõ ma si te ãsimizawizé hã sa'êtê na tâma 're hâimana. Taha wa, ma tô sitême asô tihârâ za'ra wa'wa, rowê ãsi'utõrĩõ âma ãsiré 're aihâimana u'âsi za'ra wa'aba mono da, Cristuhu nhib'a'uwê oto 're anomro aba mono wa.

¹¹ 'Re ãhâimana u'âsi mono hã danhipai u dama pire uptabi na 're hâimana mono wa, wa za taha âma si 're wawata u'âsi za'ra.

Pedru te te ãdazawizé wasu'u

¹² Sira hã ma tô ãpawapto, aima ãnhimiroti syry za'ra wa'aba nherê, te te aima rob'ui'ééré za'ra wa'aba da. Ta hã ãsisânawã ne, te ãma 're hâimana. Taha wa, ãma umnhasi di. Wa hã wa tô ãsima aiwê za'ra wa'wa, ãnhimiroti na te aipawaptob za'ra wa'aba da, Wanhib'apito âma si asiptete sina 're anomro aba mono da, 'Re ãhâimana u'âsi mono nhimipawaptobzé hã asi'uihã na asina 're waihu'u za'ra wa'aba mono da. Taha wasu'u na si, wa tô te aima 're rowasu'u za'ra wa'wa, tô sena wa. Taha wa, te te 're aipawapto wê za'ra wa'aba mono wa, te za asiptete sina âma 're anomro aba mo.

¹³ Wanhib'apito zazei'wa norĩ hã, Babironiza na 'ri nho'õmo nhisi âma 're ãhâimana za'ra mono norĩ hã, ma tô Wamama hã sima pisutu za'ra, ãsib'a'uwê oto 're hâimana za'ra mono da. Ta norĩ zama ma

tô timreme na ãma asawi za'ra wa'wa. Ì'ra na te 're ãsisi mono zama, ma tô duré timreme na ãma asawi za'ra wa'wa, Marcusi hã.

¹⁴ Tame te za uburé asiré ãsazei'wa 're aihâimana za'ra wa'aba mono wa, asõ'utu na asisawi sina 're asitob'rata hârâ za'ra wa'aba mo.

Cristuhu nhib'a'uwẽ norĩ, rowẽ na ãma 're aihâimana za'ra wa'aba mono da si, wa aima za'ra wa'aba te tiwi 're rowaptẽrẽ u'âsi, Wamama wi.

'Re ãhãimana u'ãsi mono zadawa wasu'u
New Testament in Xavãnte (BR:xav:Xavãnte)

copyright © 2004 Wycliffe Bible Translators, Inc.

Language: Xavãnte

Translation by: Wycliffe Bible Translators, Inc.

Xavãnte [xav], Brazil

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 1882536746

The New Testament

in Xavãnte

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

744f0b3a-210f-53c7-b3a1-39b62617ba0c